

EBERUNO

Kirisi de malaikanɔla 1:1-2:18

Kirisi de Musala 3:1-4:13

Kirisi de Haruna buri sa'orinɔla 4:14-7:28

Kirisi sa'orikena deŋla 8:1-10:39

Ò Luda náani ke 11:1-12:25

Lédammanaa 13:1-13:25

Luda Né de malaikanɔla

¹ Luda yá ò ó dizinɔne yá káaku annabinɔ gāi gèn baaakɔ zénɔ gūn dasi, ² ama à yá òwɛɛ a Né gāi gɔɔ kpede díkīnanɔn sà. Né pì gāin Luda andunia kèò, à dìte kū àkū mé anigɔ pò sīnda pínki vī. ³ Àkū mé à Luda gakuri tékena ũ, à de a kunna ũ sānsān. Àkū mé à pò sīnda pínki kūna kū a yá'ona gbānao. Durunnaɔ kēmmana gbera à vùte musu Luda zókɔde ɔplai. ⁴ Lákū tó kū à blèe pì de malaikanɔ póla nà, lɛn a zókɔ deŋla lɛ. ⁵ Luda yá dí ò malaika kenɛ yá yá?

Ma Néme n ũ, ma n i gbāra,

Kesɔ:

Manigɔ de a De ũ,

anigɔ de ma Né ũ.

⁶ Kū Luda tò a dauduu sù andunia gūn à pì:

A malaikanɔ donyī kenɛ ní pínki.

⁷ Malaikanɔ yá musu à pì:

Adì a zīrinɔ lí ïa ũ,

a zīkerinɔ sɔ tévura ũ.

⁸ A Né yá musu sɔ à pì:

Luda, ïnigɔ vutena kíblegbaaa gɔɔ sīnda pínkime,
ndìgɔ n kíkɛgo kūna yāzede ũ.

⁹ Ñ ye yāmanakenaai, n zā vānikena gu.
Abire yāi Luda, n Luda, n ka kín,
à ponna písimma de n gbēnola.

¹⁰ Ò pì dɔ:

Dikiri, n andunia zīni pète zaa káaku,
mɔsu bi n ɔzīme.

¹¹ Ñ pínki ní gēte, ama ñinigō kun.

Oni zī kū lán pókasa bà,

¹² ñni ní koko lán uta bà,

ñni ní lite lán pókasa bà.

Mɔkōn sō, n kuuna digō dokōnɔ,
n gɔrɔ lakana vīro.

¹³ À yā dí ò malaika kenε yā yá?

Ñ vute ma ɔplai

ari màgō n ìberenɔ kenne n tintin ũ.

¹⁴ Malaikanɔ bi nini zīkerinɔme ní pínki. Luda dì ní
zī de ò kpá gbē kū oni surabana lenɔime.

2

Surabana zōkō

¹ Abire yāi ò yāpura kū o mà kū ɔplapla gíngin,
de òsun kē zéaro yāi. ² Zaakū yā kū Luda dìte
malaikanɔ gāi bi tilasime, akū ò fīnaa bò gbē kū ò
gì mai ò pānenɔne a zéa, ³ tó ódi surabana zōkō pì
yā da sōro, óni bo yá? Surabana yā pìi bò Dikiri
kīnaame, akū gbē kū ò mànɔ yāpura kpàawere.
⁴ Luda èra à yāpura kpà yā piia kū sèedanɔ kū
yābonsarenɔ kū daboyā dasi kenanɔ kū a Nini gba
kū à kpàateteñnenɔ a poyenyīnaaa.

Yesu gōna bisāsiri ũ lán ó bà

⁵ Adi ke malaikanɔn Luda andunia zia kū óteni a
yā o nàñne ní ɔīro. ⁶ À kú Luda yān gukea ò pì:

Bón bisāsiri ũ kũ a yā ðìgõ ðonguu?

Bón a ũ kũ ndì laakari ðaa?

⁷ N a kè kīana malaikanɔi féte,
n a kà kpatan kũ gakurio kũ bèereεo,

⁸ n tò pò sīnda pínki m̀i nàtene.

Kũ Luda tò pò sīnda pínki m̀i nàtene, adi a ke tó minatenanεε sariro. Tera lán dí bà, ódi e kũ pò sīnda pínki m̀i nàtene gīaro, ⁹ ama o è kũ Yesun ò téa. Luda a kīa malaikanɔi ari gɔɔ pla, de Luda gbēke gūn à ga gbē sīnda pínki gēne ũ, akũ à a kà kpatan kũ gakurio kũ bèereεo ga wari kũ à kè yāi.

¹⁰ Lákũ pò sīnda pínki bò Luda kīnaa nà, akūsõ pò sīnda pínki de a pò ũ, kũ à ye à gē kũ gbēnɔ dasi a gakuri gūn a nénɔ ũ, à kō s̀i kāao à gbē kũ à surabana zé bóinne papa warikεnaa gūn. ¹¹ Gbē kũ ò gō Luda gbēnɔ ũ kũ gbē kũ àdi n̄ ke Luda gbēnɔ ũo, n̄ pínki de dokōnɔmε. Abire yāi n̄ s̀isina a gbēnɔ ũ ði a wé'i kũro. ¹² À p̀i:

Mani n tó bo ma gbēnɔ té,
mani n sáabu kpá kōkakaranaa gūn.

¹³ À p̀i ðɔ:

Mani a náani ke.

À p̀i ðɔ:

Makūmε la kũ né kũ Luda kpàmano.

¹⁴ Zaakũ né p̀inɔ bi bisāsirinɔmε, akāa se à gō bisāsiri ũ lán n̄ bà, de à ga à Ibilisi kũ àdi su kũ gao kakate, ¹⁵ à gbē kũ òtɛn vīna ke ganε òtɛn zò ble ari n̄ wèndi lénno bo. ¹⁶ Yāpura gūn malaikanɔn àtɛn ɔ ðam̄maro, Ibrahī burinɔmε. ¹⁷ À kō s̀io à gō lán a dakūnanɔ bà yā sīnda pínki gūn, de à gō

Sa'oriki sùrude náanide ũ Luda zĩ gŭn, gběno durunna kútekebo ũ do. ¹⁸Lákú à wari kè à yōogwanaa f̃ nà, ani f̃ à gbě kú òteni n̄ yō ò n̄ gwano faaba ke.

3

Yesu de Musala

¹ Abire yāi ma gběno, ákõno kú Luda á sísi a su a kīnaano, à laasun lé Yesu kú Luda a zĩ Sa'oriki kú o zεo ũa. ² Náanideme Luda kú à a ditene lákú Musa de nà Luda onn. ³ Lákú onkaterii bèere digō de onla nà, len Yesu gakuri zōkō de Musa pōla le. ⁴ On sīnda pínki a kàteri vī, akūsō pō sīnda pínki Kàterin Luda ũ. ⁵ Luda on zīkeri náaniden Musa ũ, yā kú Luda ni o sèedademe. ⁶ Kirisi sō bede pì néme. Luda a on nàne a oĩ. Ókõnõme on pì ũ, tó ó kpé óten tãmaa kú ó vī lé gbě kú kù gbãnao.

Luda gběno kámmaboki

⁷ Abire yāi lákú Luda Nini ò nà:
 Tó a Luda kòtoo mà gbāra,
⁸ àsun sãgbãna ke lákú á dizino kè nàro,
 kú ò ma le ò ma gwa goro kú ò bò ma kpe gbárannan.
⁹ Bee kú ò ma yãkenano è wè bupla,
 ò ma le ò ma gwa gwe, ò ma gbãna lé gwà.
¹⁰ Akú ma po fè gbě pìn̄oi,
 ma pì gbě sāsãnanõme n̄ ũ,
 odi ma zéno d̄sro.
¹¹ Akú ma la dà ma pofè gŭn ma pì,
 oni gẽ ma kámmabokinlo fá.
¹² Ma gběno, à laakari ke á gběke sún̄gō swè
 vāni ludanaanikenasari vī ari à gé kēo Luda
 Wèndidearo. ¹³ Gu kú àdi do kú adì pi Gbāra

pínki, àgõ lé dakõa, de durunna sún á gbēke sãte à sãgbãna kũro yã. ¹⁴ Zaakũ Kirisi gbēnɔn ó ũ, tó ó náani kũ ó vĩ zaa káaku kũna gbãnagbãna ari a léa.

¹⁵ Lákũ ò ò nà:

Tó a a kòtoo mà gbãra,

àsun sãgbãna ke lákũ á dizinɔ kè nà

gɔɔ kũ ò bò ma kpɛro.

¹⁶ Dínɔn gbē kũ ò Luda kòtoo màa ò bò a kpɛnɔ ũ, tó adi ke gbē kũ Musa n bóte Misilanɔ baasiroo?

¹⁷ Dínɔn Luda pɔ fěnyĩ ari wè bupla, tó adi ke gbē kũ ò durunna kè, n gèe gò katena gbáranna gũnnɔ baasiroo?

¹⁸ Dínɔn à la dàinne kũ oni gē a kámmabokinlo, tó adi ke gbē kũ ò gí a yã mainɔ baasiroo?

¹⁹ O è kũ odi le ò gēnlo n lu-danaanikenasari yã.

4

¹ Zaakũ gēna kámmabokin kũ Luda a lé sè kpé kun, ò laakari ke, de ó gbēke sún kurairo. ² Zaakũ o baaru nna mà lán n bame, ama yã kũ ò màa pì àre vĩnɛro, kũ odi ma kũ ludanaanikenaaro yã. ³ Ókɔnɔ kũ o yã pì sìnɔ, odi gē kámmaboki pìn. Mókɔnɔ sɔ Luda pì:

Ma la dà kũ pɔfěo ma pì,

oni gē ma kámmabokinlo,

À yã bire ò bee kũ à a zĩ m̀i dè zaa anduni-akatena gɔɔ, ⁴ zaakũ ò gɔɔ supplade yã ò Luda yãn gukea ò pì, gɔɔ supplade zĩ Luda kámma bò kũ zĩ kũ à kèe pínki. ⁵ O mà tera à pì, oni gē a kámmabokinlo. ⁶ Zaakũ gbē kũ ò baaru nna pì mà zaa káakunɔ dí gēnlo, kũ odi síro yã, akũ a gēnaa gò gbē pãndenɛ. ⁷ Akũ Luda era à gɔɔ ke d̀te d̀ òdi

pi Gbāra, abire gbera a gii kè akū à Dauda gbà lé, à ò lákū ò ò nà tera:
Tó a a kòtoo mà gbāra,
àsun sàgbāna kero.

⁸ Tó Yɔsua gè kũnwɔ kámmaboki pìn yā, de Luda dí gɔɔ pānde yā o kpekpero. ⁹ Àkū mé à tò kámmaboki gè Luda gbēnɔ pɔ ũ. ¹⁰ Zaakū gbē kū à gè Luda kámmabokin kámma bò kū a zĩome, lákū Luda kámma bò kū a zĩo nà. ¹¹ Tó leme, ò wé tã ò gè kámmaboki pìn, de ó gbēke sún gí Luda yā mai, à fu lán n̄ bàro yāi. ¹² Luda yā bñe, akūsɔ à gbāna, a lé nna de fēneda kpa plaplala. Àdi n̄ zɔ à gè nèsee gūn ari ninin, àdi gè mēpepekerekin ari wá bɔɔɔn, àdi laasun kū nèse yāo gwagwa. ¹³ Luda pókena ke utenanero, a ke kpáne guiro. Luda kū óni ó yānɔ sète ò one dì pɔ sinda pínki e ari a bia.

Yesu de sa'orikinla

¹⁴ Zaakū ó sa'oriki zókɔ kū ludambe wèkɔa ari Luda kīnaa vī Luda Né Yesu ũ, ògɔ zé kū o sè yā kūna gínjin. ¹⁵ Zaakū ó sa'oriki vī kū ani fɔ à ó wēnda dɔ ó gbānasariké gūn. Ò a yò ò gwà lán ó bà yā sinda pínki gūn, adi durunna kero. ¹⁶ Abire yāi ò na Luda Gbēkekenneri kiblegbaai kū swèeo kpatena, de à ó wé gwa à gbēke kewere a gɔɔa.

5

¹ Òdi sa'oriki sinda pínki sé gbēnɔ téme, òdi a dite n̄ wéde ũ Luda kīnaa, àgɔ gba kpáa, àgɔ a gbagbañne n̄ durunna yāi. ² Ani fɔ à ke kū gbē kū ò sãte n̄ dōnasariké gūnnɔ busebuse, zaakū àpii kú kū gbānasarikéome se. ³ Abire yāi séde à sa o a zīda

durunna yā musu, lākū àdi o gbē kparano pọ́ musu nà dọ. ⁴ Gbēke dī a zīda ká kpataa pìi gūnlo. Luda mé àdi a ká, lākū à Haruna kàn nà.

⁵ Len se Kirisi dí a zīda ká sa'oriki kpataa gūnlo, Luda mé à a kàn à pì:

Ma Némε n ũ,
gbāran ma n i.

⁶ À pì Luda yān gukea dọ:

Īnigō de sa'ori ũ goro sīnda pínki lán Melekizedeiki bà.

⁷ Goro kū Yesu kú andunia gūn à adua kè kū wiki gbānao kū wé'io, à kúte kè Luda kū ani fō à a sí gaaane, akū Luda a yā mà, kū àdi a yā da yāi.

⁸ Bee kū a Ludanekεo, à mìnatenà Ludanε dàda a warikenaa gūn. ⁹⁻¹⁰ Kū mana pèkerεa à làka, Luda a kà sa'oriki ũ lán Melekizedeiki bà, akū à gō surabana kū àdi lākaro boki ũ gbē kū òdi a yā manone n pínki.

Laakarikεna funaai

¹¹ Yā bire musu ó yā vī dasi ò oáre, ama a bokotena zī'ūme, zaakū adì yā doro dō likaro.

¹² Ákōno kū a gii kèn lán dí bà, à mana àgō de yādannerino ũme, ama ari tera á kpé kú ò era ò Luda yā kū òdi dada gbē dufunone daáre dọ. Yō'i mé à kō si kááo, adi ká à yūku pọ́ blero. ¹³ Zaakū yōmiri sīnda pínki bi néme, adi ká à oze dōkōne kū oploro.

¹⁴ Yūku sō, gbē kāsara kū ò dōne kèono pómε. Ò a mana dōna kōne kū a vānioo dàda.

6

¹ Abire yāi ò Kirisi yādannena káakupono kpá kpe, ò gé are ari ò gō gbē pèkerenanō ũ. Adi ke óni era ògō yātákpata dínō gbè sísi dōnlo: Kpelina yā gènonεε, ludanaanikεnaa, ² da'ite yādadanaa,

onammanaa, gèno vuna ke zia yâkpatεkenaa. ³ Tó Luda wè, óni yâ bireno kpá kpado ò gé arε. ⁴ Zaakū tó gbē wé kē, à Luda gba lè, a baka kú Luda Nini gūmmε, ⁵ tó à Luda yā kū andunia kū àten su gbānao í kè, à a nna dō ⁶ tó à fùa, zé kun kū à era à nèse lite doro, zaakū àten Luda Né pá lía dōmε, àten wé'i daa gupuraamε. ⁷ Tó legū ten ma zīte gèn baaakō àten mōto le, akū à pó kū à àre vī búbarinone bùte, Luda di arubarika dan. ⁸ Tó à lè kū lèkaraao bùte sō, à ginaamε, à zā kū lékennenaao. Ani mì de kū téomε.

⁹ Ákōno sō ma gbē yenyīdeno, bee kū o ò le, ó laakari kpatena á yā musu kū á kú kū yā mana kū ò bò surabana zé gūnno. ¹⁰ Luda di yā ke a zéa, á yâkenano kū yenyī kū á vī kāao ni sāaguro, zaakū a kpányī kè a gbēnoε, akūsō á kpé àten ke. ¹¹ Ó ye á baadi gō ania vī le ari a léa, de ásun sika ke pó kū á wé dōi yā musuro. ¹² Ásun ma'á kero. À gbē kū òten Luda náani ke kū menao òten pó kú Luda a lé sè leno ágba sé.

Lé kú Luda sè sika vīro

¹³ Goro kú Luda ten lé sé Ibrahīne, kú gbēke kun deala à sí kāao, a yāin à sī kú a kunnao ¹⁴ à pīne, áni arubarika daagu yāpura à tó a buri karanε. ¹⁵ Ibrahī mena fī, akū à pó kú Luda a lé sēne lè. ¹⁶ Òdi la da kú gbē kú à deñla tōmε. Ladana mé àdi tó ò yā yāpura dō, akūsō àdi lékpakōana kēkōañne. ¹⁷ Luda ye à mó gbē kú a lése na ni gō ní pó ūnoε swáswa kú a lé litena vīro, akū à sī kú a kunnao. ¹⁸ Lemε yā mèn pla kun kú à litena vīro, Luda ni fō à éke to a musuro. Yā pīno teni ókōno kú o naino gba

swè manamana, de ò tãmaa kũ ó wé òi ke sikaa sari. ¹⁹ Ó tãmaa bire vī ó wèndibadɔɔ ũ. À náani vī, akūsɔ à gbàna, àdi gē kũoo Luda kúkia lábure kpe, ²⁰ gu kũ Yesu gĩnake à gèn ó yāi, à gò sa'oriki ũ ari gɔɔ sīnda pínki lán Mēlekizēdeki bà.

7

Sa'oriki Mēlekizēdeki

¹ Mēlekizēdekime Salemu kína ũ yā, Luda Musude sa'oriime. Gɔɔ kũ Ibrahĩ zī blè kínanɔa àtɛn su, akũ Mēlekizēdeki gèe à dàale, à sa mana òne, ² akũ Ibrahĩ aruzeke kũ àtɛn suo pínki kuride kpàa. Mēlekizēdeki tó pìi pìi, yāzede kína. Abire gbera Salemu kína bire pìi, aafia kína. ³ À de kũ dao kũ dizinɔ vīro, a wèndi naana ke mīdena vīro. À bò lán Luda Né bàme, sa'oriin a ũ gɔɔ sīnda pínki.

⁴ À gwa lákũ à zōkō nà. Ó dizi káaku Ibrahĩ aruzeke kũ à sète zīlan kuride kpàa. ⁵ Musa doka dīte Levi buri kũ ò de sa'ori ũnɔne, ò pó kuride sí n̄ Isaraila dakenɔa, bee kũ n̄ Ibrahĩ burikeo. ⁶ Mēlekizēdeki bi Levi burinlo. Bee kũ abireo à Ibrahĩ pónɔ kuride sī, à sa mana ò Ibrahĩ kũ Luda lé sènene. ⁷ Sikaa sari gbē kũ à sa mana ò gbēne zōkō de gbē kũ à sa mana ònela. ⁸ Sa'ori kũ òdi pó kuride sí pìnɔ bi gbē kũ òdi ganɔme. Mēlekizēdeki sō, gbē kũ ò pì àdigō kun gɔɔ sīnda pínkin a ũ. ⁹⁻¹⁰ Gɔɔ kũ Mēlekizēdeki gèe à dà Ibrahīle, odi Levi i kòro, à kú a dizi de Ibrahĩ wógbamme. Abire yāi oni fō ò pi sé, gɔɔ kũ Ibrahĩ pó kuride pìi kpà, Levi buri kũ òdi pó kuride kpámmanɔ mé ò kpà.

Yesu de lán Mēlekizēdeki bà

11 Levi buri sa'orii pìnɔmε doka kũ Musa kpà Isarailanɔa zĩni ũ. Tó oni f̄s̄ ò tó gbẽnɔ ḡs̄ papana, oniḡs̄ sa'ori pānde ni v̄i lán Melekizεδεki bà doro, sé Haruna buri sa'ori ḡaa. 12 Tó sa'orinɔ lítε, séde doka lítε. 13 Gbẽ kũ ò yā birenɔ ò a musu bi Isaraila buri kũ a gbẽke dí sa'ona zĩ ke zikiromε. 14 Zaakũ ó d̄s̄ s̄ans̄an kũ ó Dikiri bò Yuda buri ḡummε. Ódi ma kũ Musa sa'ona yā ò buri p̄i musuro. 15 Yā kũ yā p̄i wé bòn dí: Sa'ori pānde bò lán Melekizεδεki bà. 16 A ḡs̄na sa'ori ũ bi doka ke burike yānlo. A wèndi kũ àdi láraro gbāna yāimε. 17 Zaakũ ò p̄i:

Īniḡs̄ de sa'ori ũ ḡɔɔ s̄inda p̄inki Melekizεδεki ḡan.

18 Ò doka kũ à kun yā p̄i kpà kpado, kũ à gbānaro, akūs̄s̄ à kun p̄óke ũro. 19 Zaakũ doka p̄i dí tó gbẽke ḡs̄ papanaro. Akũ tāmaa kũ à s̄ana zé b̄owεrε, kũ o nao Ludai.

20 Abire ḡbera Luda dí abirekũ ke ladanaa sariro. Gbẽ kparanɔ ḡs̄ sa'orinɔ ũ ladanaa sarimε, 21 ama Yesu ḡs̄ sa'ori ũ kũ ladanaao, kũ Luda p̄inε: Dikiri la dà ani lé sukparo, à p̄i aniḡs̄ de sa'ori ũ ḡɔɔ s̄inda p̄inki.

22 Ladanaa p̄i yāi Yesumε zenkpeke ũ kũ Luda bàka kunna kũńwo dufu de a z̄ila. 23 Abire ḡbera sa'orinɔn dasi yā, zaakũ ga dì tó òḡs̄ kú n̄ zĩ ḡun ḡɔɔ s̄inda p̄inkiro. 24 Ama kũ Yesu kun ḡɔɔ s̄inda p̄inki yāi, a sa'orikenaa ḡēnεblena v̄iro. 25 Abire yāi ani f̄s̄ à gbẽ kũ òdi na Ludai kũ a gbānaonɔ sura ba mámmam, zaakũ à kun ḡɔɔ s̄inda p̄inki de àḡs̄ kúte keńne Ludanε.

26 Sa'oriki bire taka mé à k̄s̄ sì k̄oo. A kunna adona. À yā v̄ani ke gbās̄i v̄iro. Luda a k̄k̄s̄a kũ durunnakerinɔ, à a s̄è à tào musu ari a k̄inaa. 27 A

bàka kú kú sa'ona lákú gu dìgõ dɔ nào lán sa'oriki kparano bàro. Gbẽ pìno dì sa o n zĩda durunnano yãĩ kú n gbẽno póno dɔ. Àkãa s̄s̄, à ò ḡḡn dome, kú à a zĩda kpà. ²⁸ Musa doka dì gbẽno ká sa'orikino ũ n gbãnasarike gũmm̄e, ama kú Luda sì kú a kunnaao doka pì ditena gbera, akú à a Né kú à ḡḡ papana ari gɔro s̄inda pínki kàn.

8

Yesum̄e ó Sa'oriki ũ

¹ Yã kú óten o m̄in dí: Ó sa'oriki bire taka v̄i vutena kíblegbaaa musu Luda z̄sk̄de ɔplai. ² Àdi zĩ ke Ludakukia, bizakuta yãpura kú Dikiri dòn, adi ke pó kú bisãsirino dònlo. ³ Zaakú suna kú gbanò kú sa'onao yãin òdi sa'oriki s̄inda pínki kái, à mana àpii ḡḡ pó v̄i à kpá se. ⁴ Tó à kú andunia ḡn, aniḡs̄ de sa'ori ũro, zaakú sa'ori kú òdi su kú gbanò lákú doka dìte nàno kun kò. ⁵ Zĩ kú òten ke bi pó kú à kú musu takam̄e, a ninim̄e. Abire yãĩ kú Musa ye à bizakuta dɔ, Luda p̄ne à laakari ke à pó kú a a taka m̄one kpi musu ke lákú à de nà pínki. ⁶ Yesu mé à Luda bàka kunna kũoo yãk̄k̄eri ũ. Zaakú Luda bàka kunna kũooo pì de a bàka kunna kũn̄wo zĩla, zĩ kú ò d̄ane de sa'oriki p̄no p̄la. Luda bàka kunna kũooo p̄i l̄esena de a zĩla dɔ. ⁷ Tó Luda bàka kunna kũn̄wo zĩ p̄i papanam̄e yã, de a plade zé v̄iro. ⁸ Kú Dikiri Isarailano taari lè à p̄i:

A gɔro ten su kú mani ma bàka

kunna kú Isarailano kú Yudanò dufu ke.

⁹ Aniḡs̄ de lán ma bàka kunna kú n̄ dizino

gɔro kú ma n̄ kú n̄ ɔa ma n̄ b̄ote Misila bàro.

Zaakú odi ze kú ma bàka kunna kũn̄wooro,

akū ma í tón.

¹⁰ Ma bàka kunna kū Isarailano goro birenò gbèra
yān dí:

Mani ma dokayāno dañne í nēsēn,

mani kē í swēēa.

Manigō de í Luda ũ,

onigō de ma gbēno ũ.

¹¹ Í gbēke ni yā dada a dakenero,

í gbēke ni ma dōna da a gbēnero,

zaakū í pínki nigō ma dōme,

né fíti gbē zōkō í pínki.

¹² Mani sùru ke kūńwo kū í taarinò,

mani í durunnao yā da doro.

¹³ Kū Luda bàka kunna kūńwo dufu pì yā ò, à a
káakupò zī bò. Pó kū à zī kū à bùsa, a kpana gui zāro.

9

Luda bàka kunna kūńwo zī sa'onaa

¹ Luda bàka kunna kūńwo káaku donyí zé vī kū
Ludakuki kū à kú zīteo. ² Fitila kū teburu kū òdi
burodi kátea Ludanero kú kpéda kū òdi pì gu kū
à kú adonan. ³ Kpéne kū òdi pì Ludakuki pì kú
lábure plade kpe. ⁴ A gūnn turaretitikpataki kū
ò pì kū wurao kun kū Luda bàka kunna kūńwo
àkpati kū wura kútea mámmamwo. Wura lo kū
mana kú a gūn kú àkpatii pìi gūn kū Haruna gò
kū à lá bòto pàao kū Luda yādítēna gbè anlonoo.

⁵ Àkpatii pìi musu kerubu gakeridenon kú durun-
nakēmmakila. Pó pìno bokotēna dodo goron díro.

⁶ Í katēna le gūn, sa'orino digō gē kpéda gūn gèn
baakō ò í sa'ona zī ke. ⁷ Sa'oriki mé àdi gē kpéne
wè do gèn do, akūsō àdi gē aru sariro. Àdi aru

pì fáfá a zīda durunna yāi kū a gbēno pó kū ò kè dōnasarike gūnwō. ⁸Luda Nini ten mowere, goro kū kpé káaku pì kun, Ludakuki zé wēnaro. ⁹ Abirekū ten yā lekōawere kū tera yāo à pì, pó kū donyīrii di Luda gbanō kū sa'opo kū àdi kpáano di fō à a nēse danε dokōno swáswaro. ¹⁰ Yā ditena pino bi mēbarayāme. Póble kū pómínaao kū gbàbona buri sīnda pínki yāme. Ò dìte ari zé dufu goro gō káme.

Luda bàka kunna kúnwo dufu sa'onaa

¹¹ Akū Kirisi sù yā mana kū à kà tera sa'oriki ũ. À gè bizakuta kū à zōkō akūsō à papana de a káakupōla gūn, kū bisāsiri mé à dōro, andunia díkīna pón sōro. ¹² Adi gē Ludakukin kū blè ke zù aruoro, à gè kū a zīda aruo gèn dome, à gbēno bōo ari goro sīnda pínki. ¹³ Zaakū òdi blè aru kū zùsa aruo kū zūnunu kū ò kpàta túbuo fáfá gbē kū ò gbāsīnoa ò gbà booíne, ¹⁴ oni Kirisi pó o do yá? À a zīda kpà Ludaa mamberu sari kū Nini kū àdigō kun goro sīnda pínki gbānao. A aru di ó swè pípiwere bona yā pā kekēna pino gūn, de ò zī ke Luda Wēndidenε.

¹⁵ Abire yāi Kirisi mé à Luda bàka kunna kúnwo dufu yákekēri ũ, de gbē kū Luda n sísino wēndi kū àdi lákaro kū à a lé sè le yāi. À gà de à n bo, à taari kū ò kè Luda bàka kunna kúnwo káakupō yā musunō kēnma. ¹⁶ Tó ò ye ò zī ke gbē légbeditenaana, sé ògō dō sānsān kū ade gà, ¹⁷ zaakū ga gberan légbēε digō gbāna ví. Tó légbēditeri kpé bēne, légbē digō gbānaro. ¹⁸ Abire yāin odi Luda bàka kunna kúnwo káakupō pì sa ke aru sariro. ¹⁹ Kū Musa doka yāditenano ò gbē sīnda pínki wára, à sākā

tēra zónzon kũ sēsōvlāoo sè à zō zùsane b̀̀r̀o kũ blèkoffini aru kũ ò ỳ̀katε kũ íooa, à f̀̀f̀f̀ Musa dokaa kũ gb̃̀ño d̃o ñ pínki ²⁰ à pì, Luda bàka kunna kũñwo arun gwe, kũ à d̀̀tεáre à kũna. ²¹ Len Musa aru f̀̀f̀f̀ bizakutaa kũ sa'ona z̀̀kεb̃̀ño d̃o pínki. ²² Doka gũn aru mé àdi gb̀̀ bo p̀́ daside pínkinε. Aruk̃tεnaa sari durunnaño k̃mmana kunlo.

Kirisi a z̀̀da kp̀̀a sa'op̃o ũ durunna m̀̀dena ỳ̀i

²³ Zaakũ à k̃ s̀̀o ò gb̀̀ bo p̀́ kũ ò kũ ludambε taka p̀̀ñnε lán abire bà, sa'op̃o kũ à de abirekũla k̃ si kũ ludambε p̀́ p̀̀ño. ²⁴ Zaakũ Kirisi dí g̃ε Ludakuki taka kũ bis̃siri b̀̀ñlo, à g̃ε a ỳ̀puran ludambεmε, gu kũ à kun tera ó Zekũnwode ũ Luda arε. ²⁵ Sa'oriki d̀̀i g̃ε Ludakukin kũ p̀́k̃ade aruo w̃ε kũ w̃εeo, ama Kirisi dí g̃ε de à a z̀̀da kp̀̀a g̃̀ñ baaak̃o ỳ̀i. ²⁶ Tó adi ke lero, de àt̃en wari ke g̃̀ñ baaak̃o zaa anduniakatena g̃̀r̃o. Ỳ̀pura gũn à s̀̀ g̃̀ñ domε g̃̀r̃o kũ andunia kà a k̀̀kia s̀̀, à a z̀̀da kp̀̀a sa'op̃o ũ, de à durunna m̀̀ deo. ²⁷ Luda d̀̀tε bis̃sirine à ga g̃̀ñ do, gbasa à ỳ̀kpate ke k̃aa, ²⁸ len Kirisi a z̀̀da kp̀̀a g̃̀ñ do lε, à gb̃̀ño durunna d̀̀i a m̀̀ia dasi. Añi era à su a g̃̀ñ pladeo, adi ke durunna ỳ̀in doro, de à gb̃̀ kũ ñ w̃ε d̃oiño sura ba ỳ̀ime.

10

¹ Musa doka bi ỳ̀ mana kũ àt̃en su takamε, adi ke ỳ̀ p̀̀inlo. Abire ỳ̀i sa dok̃ño p̀̀i ona g̃̀ñ baaak̃o w̃ε kũ w̃εeo d̀̀i f̃̃ à gb̃̀ kũ òt̃en na Ludaiño ke papana zikiro. ² Tó sa p̀̀i onaa gb̀̀ b̀̀ donỳ̀riñnε g̃̀ñ do ari g̃̀r̃o s̀̀inda p̀̀inkimε ỳ̀, de ñ kũ gb̀̀na, ò a onaa tò.

³Yápura gūn sa'onaa pì mé àdigõ gbẽno durunna yã dõngu wè kũ wèeo. ⁴Zaakũ zùsa kũ blèkofĩnioo aru dì f̃ à durunna kḗm̃ma zikiro. ⁵Abire yã kũ Kirisi ten su andunia gūn, à pì Ludane:

Í ye sa'opo ke gbairo,
akũ n bisāsiri m̃e k̃m̃ene.

⁶Sa'opo kũ òdi ká tén à té kũ

kũ sa'opo kũ òdi o durunna yã musuo
dì kánguro.

⁷Akũ ma pì: Makũme la!

Lákũ ò k̃ takadan ma yã musu nà
ma su n p̃yenyĩna kem̃e, Luda.

⁸Káaku gĩa à pì, sa'ona kũ gbao kũ sa kũ òdi ká tén à té kũo kũ sa kũ òdi o durunna yã musuo dì ká Ludaguro, à yeiro, bee kũ doka mé à d̃te. ⁹Akũ à pì, akāame dí, a su a p̃yenyĩna kem̃e. À a káakupõ kpà kpado a plade d̃tena yã. ¹⁰Luda p̃yenyĩnaa pì kenaa gūn Yesu Kirisi a z̃ida kpà sa'opo ũ g̃en do, à tò ó kú adona Luda gbẽno ũ.

¹¹Gõrõ s̃inda p̃inki sa'orino d̃igõ kú ñ z̃ĩ gũm̃me, ògõ sa dokõno kũ àdi f̃ à durunna kḗm̃ma zikiro o g̃en baaakõ. ¹²Kirisi s̃õ, à sa ò durunna yã musu g̃en dome ari gõrõ s̃inda p̃inki, akũ à g̃e à ṽute Luda oplai. ¹³Zaa gõrõ kũ à kú gwe, àten d̃ã Luda a ibereno keare a t̃intin ũ. ¹⁴Zaakũ sa'ona g̃en do p̃i gūn, à tò gb̃e kũ à gb̃à b̃óñnenõ g̃õ papana ari gõrõ s̃inda p̃inki. ¹⁵Luda Nini era àten yã pì owere d̃õ à pì:

¹⁶Ma bàka kunna kṹwo gõrõ bireno gbera yã́n dí:
Mani ma dokayãno dañe ñ ñese gūn,
mani k̃e ñ sw̃èea.

17 Akū gbasa à pì:

Mani n durunna kū n taarinɔ yā da doro.

18 Lákū à n durunna kēm̄ma nà, sa'ona n yāi zé vī doro.

Ò na Ludai

19 Abire yāi ma gbēnɔ, kū Yesu aru gbānao ó gēna Ludakukin zé vī kū swè̄εo kpatena. 20 À wè̄ndi zé dufu bòwεε a mēε gāi à gè̄ kūoo lábure kpε ari Ludakukia. 21 Lákū ó sa'ori zōkō vī nà Luda ɔnkūri ũ, 22 ò na Ludai kū nēεε doo kū a náanikena sikaa sario kū swè̄ kū ò pìpi ò taari laasun bò a gūnwɔ kū mē̄ kū ò a zú ò kū í swáswao. 23 Ògō tāmaa kū o zεo kūna gíngin, zaakū Luda a lé sè, akūsō à náani vī. 24 Ò laakari dōkōa, ò té kákōgu yenyī kū yāmanakenaao yā musu. 25 Òsun pā kpá ó kōkakaranaai lākū gbēkenɔ dì ke nàro. Ò lé dakōa, atēnsa lākū a è Dikiri sugɔɔ ten ká káni nà.

26 Tó o yāpura mà o dō, tó o gi óten durunna ke, sa'ona kū ani durunna kēwá kun doro. 27 Pó kū à gō̄wεε mé à de ògō wé dɔ yākpatei ũ kū swè̄kēnguo kū té gbāna kū ani Luda ibεrenɔ kakateo. 28 Òdi gbē̄ kū à gī Musa doka dai de a wé gwanaa sari gbē̄nɔn pla ke aakō sèedakpanaa musu. 29 Tó gbē̄ gè̄sεε pè̄te Luda Néa, akū à Luda bàka kunna kūr̄wo aru kū à gbà bòare gya bò, akū à Nini Gbē̄kεkεnneri sō̄sō̄, àgō dō kū a wētāmma nigō zōkō de abirekūla manamana. 30 Zaakū ó yā dīkīna òri dō à pì, akāa mé áni fīna bońma, akāa mé áni fīna bońne. Ò pì dɔ, Dikiri ni yākpate ke kū a gbē̄nɔ. 31 Yā pāsīme, tó n lεte n da Luda Wè̄ndide ɔ̄i.

32 À laasun lé á kunna yãa. Á wékēnaa gbera a wari f̃ á ɔsi z̃k̃ kanaan gūn. 33 Zīkenɔa òdi á s̃s̃, òdi á wé t̃a pari gūn. Zīkenɔa adi ze k̃u gbē k̃u òteni wé t̃a lenɔ. 34 A purusunanɔ wēnda d̃. Kū ò á p̃nɔ siáwa, a we k̃u p̃nnao, zaakū á d̃ k̃u á aruzeke mana k̃u anig̃o kun g̃o s̃inda p̃inki ṽi. 35 Abire yāi àsun tó á w̃oɔg̃o k̃u à àre ṽiáre z̃k̃ g̃ēteáwaro. 36 Séde àg̃o mena ṽi de à p̃o k̃u Luda a lé s̃e le a p̃oyenyĩnakenaa gbera.

37 Zaakū à g̃o f̃itime, ani g̃i kero, k̃u gbē k̃u àten su ni kipa.

38 Gbē mana nig̃o kun ma náani k̃u àten ke yāi, ama tó à èra kpe, ma p̃o nig̃o nnaro.

39 Gbē k̃u òdi boru k̃u kpeo ò ñ z̃iɔa kakatenɔn ó ũro. Gbē k̃u ò Luda náani k̃e ò surabanaa lenɔn ó ũ.

11

Gbē káakunɔ ludanaanikena

1 Ludanaanikenaame tãmaa kunna Luda k̃inaa sika sari ũ, yã k̃u òdi wé sialero sina yãpura ũ.

2 Gbē káakunɔ ludanaanikena mé à tò Luda ñ sáabu kpà.

3 Ó ludanaanikena mé à tò ó d̃ k̃u a yã'ona mé à andunia kàte. Pó k̃u òdi wé sialeron à p̃o k̃u òdi wé siale k̃e.

4 Habila ludanaanikena mé à tò a sa'ona Ludaa mana de Kainu p̃ola. A ludanaanikena yãin Luda a sáabu kpà, à a òte gbē mana ũ, akū à a gba si. Bee k̃u à gà, ó kpé òteni a yã ma Luda náani k̃u à k̃e pi yāi.

5 Enɔku ludanaanikena mé à tò Luda a s̃e, de àsun garo yāi. Odi a e doro, k̃u Luda a s̃e bona andunia gūn yāi. Ari Luda g̃o a sé, à a sáabu kpà, à p̃i a yã

kàagu. ⁶Gbēke yā dì ká Ludagu a náanikenaa sariro. Séde gbē kū àten nai sí kū à kun akūsō àdi fīna bo a ki weterinōne.

⁷Kū Luda lé dà Nuhua yā kū odi e yāro musu, akū à Luda náani kè, à a yā mà, à gó'ite kè, à a ondeno sura bào. A ludanaanikena mé à tò yā vùte andunia, akūsō Luda tò yā bò kāao nna a náani kū à kèe pì yāi.

⁸Kū Luda Ibrahimī sisi de à gé būsu kū áni kpáa àgō vī gūn, akū Ibrahimī Luda náani kè, à Luda yā pìi mà. À bò be, bee kū à gu kū àten gén pì dōro. ⁹À Luda náani kè, akū à be pète bizakuta ũ būsu kū Luda a lé sènne pìi gūn nibo ũ. Len Isaaku kū Yakubuo do, zaakū Luda lésenaa pìi gō ñ pò ũme. ¹⁰Zaakū wēte kū Luda kàte à bò a zīni petenaan Ibrahimī wé do.

¹¹Sara ludanaanikena mé à tò à zé lè à nò sì, bee kū parame, akūsō à zī kū, zaakū à dō kū Luda kū à lé sèare náani vī. ¹²Bee kū à zī kù, gōgbē mèn do pì buri kè dasi lán susunenō ke ísirale būsu'atē bà, oni fō ò a lé dōro.

¹³Gbē pìno gāga ñ pínki ñ ludanaanikena gūn, pò kū à a lé sènneno lenaa sari. Ò è zà dire ò gbānake kpai. Ò pì, nibo bòasunome ñ ũ zītea la. ¹⁴Gbē kū òdi o leno ten mowere kū òteni ñ zīda būsu ni demē. ¹⁵Tó būsu kū ò bòn begen òten ke yā, de ò zé lè ò era ò tà gwe. ¹⁶Ama būsu kū a mana de abirekūlan òteni a ni de, akū ludambe pò ũ. Abire yāi tó ò Luda sisi ñ Luda ũ, àdi kene wé'iyā ũro, zaakū à wéra kàte ñ pò ũ.

¹⁷⁻¹⁸Kū Luda Ibrahimī yō à gwà, akū Ibrahimī Luda náani kè, à Isaaku kpà sa'opo ũ. Luda lé sènne yā à pì, Isaaku burinon onigō piñne a burino ũ. Bee

kū abireo à zè kū a né mèn do pì kpanaao. ¹⁹ À sì kū Luda gbāna ni fɔ̀ à gènɔ vu bona gan, akū à de lākū ò pì à èra à Isaaku lè bona gan bà. ²⁰ Isaaku Luda náani kè, akū à sa'ole kè Yakubu kū Isauone. ²¹ Kū Yakubu kú ga léi, akū à Luda náani kè, à sa'ole kè Yusufu nénɔne, akū à gbāna lè a gòoa à donyĩ kè. ²² Kū Yusufu kà gana, akū à Luda náani kè, à Isarailanɔ bona Misila yā ò kū lākū oni ke kū a gèwao nà.

²³ Musa de kū a dao Luda náani kè, akū ò a ùte ari mɔ aakɔ a inaa gbera, kū ò è a àlesi mana yāi. Odi vīna ke doka kū Firi'auna dītenero. ²⁴ Kū Musa kè zōkɔ, akū à Luda náani kè, à gí ò a sísi Firi'auna nénɔgbē né ũ. ²⁵ À sì ò a wé tã kū Luda gbēnɔ de kunna kū pɔnnao durunna gūn gɔɔ plala. ²⁶ À dīte kū wé'i kū òdi damma Kirisi yāi de Misila aruzekela, zaakū ziakezi láadan a wé kúa. ²⁷ A ludanaanikena mé à tò à bò Misila, adi vīna ke Firi'auna pɔfēnero, à zè gíngin lākū à Luda kū òdi e kū wéoro èe bà. ²⁸ A ludanaanikena mé à tò à Vīnla dikpe dīte kū aru mamana kpé lé gbliao, de gbēderi sún ɔ na n daudunɔaro yāi. ²⁹ Isarailanɔ Luda náani kè, ò bikū Isira Tēraa lán zīte kori bà. Kū Misilanɔ yāa le, akū í dàńla. ³⁰ Isarailanɔ Luda náani kè, ò taa ò ò lika Yerikoi ari gɔɔ suppla, akū a bīni kòte. ³¹ Karua Rahabu Luda náani kè, à gu'asirigwarinɔ dīte à n gwá manamana, akū adi kakate kū ludayādarisarinɔoro.

³² Mani pi dera dɔɔ? Mani zé le mà Gidion yā oro ke Baraki ke Samusi ke Yefeta ke Dauda ke Samuéli ke annabinɔ. ³³ Ó Luda náani kè, akū ò zīi blè kinnanɔ, ò yā gògɔ gbēnɔne a zéa, ò lé kū Luda

sèñne gbèe lè, ò músuno lé nàkõa, ³⁴ ò té pāsī dè, ò bò fēneda léi, ò gbāna lè n gbānasarike gūn, ò pāsī kù zīi gūn, ò pè buri pānde zīkarinõa, ³⁵ ò nɔgbēnɔ né gènɔ fùte bona gan ò kpàmma. Ò mēe ù n gbēkenõa, akū ò gi ò n gbarē, de ò vu bona gan ò bo mana yāi. ³⁶ Ò n gbēkenɔ fobò, ò n gbē kū flāao. Ò mòò kà n gbēkenõa, ò n ká kpésiran. ³⁷ Ò n pápa kū gbèeo ò n dede, ò n zōkōre pla kū sàkasakaa, ò n dede kū fēneda. Ò kurè sā bāra kū blè bārao dana. Ò gò kori, ò n wé tã, ò wari dòmma. ³⁸ Andunia kunna dí kō sí kūñworo. Ò līkaralikara sèn kū kpi musunõo, ò kú gbèwēenɔn kū tñɔwēenɔ. ³⁹ Bee kū Luda gbē pìnɔ sáabu kpà n pínki a náani kū ò kè yāi, odi pò kū à a lé sèñne lero, ⁴⁰ Luda gīnake à dìte, ò gwena mana le de n pòla, de òsungõ papana ó sariro.

12

Luda a gbēnɔ totonaa

¹ Abire yāi ókõnɔ se, lākū sèedadenɔ diwái nà le, ò ɔ kpá pò kū òdi kpáwēenɔi kū durunna kū àdi ó kakūn aragao pínki, ò bàkpakūsūna kū Luda dītewere lé kū menao. ² Ò wé pé Yesua kū à bò kū ó ludanaanikena zéo akūsõ à zé pīi kè papana. À gana líaa f̃, adi a wé'iyā daro ponna kū à ditenane lena yāi, akū à gèe à vùte Luda kíblegba ɔplai. ³ À laasun lé a yāa, lākū à mena f̃ kū durunnakeri kū ò ibere bire taka sè kãaonɔo, de àsun kpasa á nèsee yakaro yāi. ⁴ Zaakū á ɔsikana kū durunnaoo gūn, ádi ze a gi ari a ge a gaoro. ⁵ Nèseyīdakūna yā kū ò òàre lán nènɔ bà sàágun yá? Ò pī:

Ma né, tó Dikiri teni n toto, òsun dite pāro.

Tó à kpàkēnyĩ, òsun tó n kā garo.

⁶ Zaakū gbē kū Dikiri yeiin àdi toto, àdi wé tã gbē kū à sì a né ũa.

⁷ À wétamma dite totona ũ. Luda mé àten abirekū keáre, kū a nénɔn á ũ yāi. Né ke kun kū a de ni gí à a totoi yá? ⁸ Tó adi á toto lán a né kparanɔ bàro, á de a nénɔ ũro, yìgisarinɔn á ũ. ⁹ Ó denɔ vī andunia la kū ò ó toto, akū o n yā mà. Lákū à de le nà, ò mi nate ó De kū à kú musu de abirekūla ògõ kun. ¹⁰ Ó denɔ ó toto gɔɔ pla pɔ ũ n òndõ lén. Luda dì ó toto ó karana yāime, de ó kunna le àgõ adona lán a bà. ¹¹ Totonaa ke pɔnna vī a gɔɔaro, sé pɔsira, ama gbē kū totonaa pì n kékenɔ dì a gbè le zã bona mana kū aafiao ũ.

¹² Abire yāi à á ɔ kū ò gõ dɔáinɔ kū á gbá kū ò gõ tererenɔ gba gbãna, ¹³ à zé sé súsu, de ákɔnɔ kū àten tɔɔtenɔ sún kakūnlo, ò gõ kū aafiao.

¹⁴ À wete àgõ nna kū gbē sīnda pínkio, á kunna gõ adona, zaakū tó gbē kunna adonaro, ani Dikiri ero. ¹⁵ À laakari ke, á gbēke sún kura Luda gbēkekennenaai à gõ gõnna ũ á té, à wari dɔ gbēnɔa dasi à n yakaro. ¹⁶ Á gbēke sún gõ de pápákeri ke ludayádarisari ũ lán Isau bàro. À a daudukεε yia pɔ gèn do blena yāi. ¹⁷ Á dõ kū à sa'ole wete a dea zã, akū Luda gine. Bee kū à wete kū wé'io, adi zé le à yā kū à kè litero.

Luda bàka kunna kúnwo zĩ kū a dufuo

¹⁸ Adi ke Sinai kpi kū oni fõ ò ɔ naaan a nairo, kū àten té kū, à gusira vī kū gu bùgubuguuo kū zàga'iao ¹⁹ kū kákāki yīsāmpanaao kū Luda kòto

gbānao. Kū Isarailano kòtoo pìi mà, ò kúte kène ò pì, àsun yáke oñne doro, ²⁰ zaakū oni yā kū à dìteíne díkína f̄sro à pì: Bee pókāde mé à nà kpi pìia, ò pápa kū gbèeo ò de. ²¹ Luda kipanaa pì bi vīna yāme manamana ari Musa pì, vīna a kū, áten lukaluka.

²² Ama a na Zaiš kpii kū Luda Wèndide wéte Yurusalemu kū à kú musuo kū a malaika dasidasi kū ò kakarana gwenò ²³ kū daudu kū n̄ tó kēna gwenò kōkakaranaao kū Luda kū à de gbē sīnda pínki yákpatekeri ũo kū gyāwān gbē mana kū ò gè papanano ²⁴ kū Yesu kū à de Luda bàka kunna kúñwo dufu yákekeri ũo kū a aru fāfāna kū áten yā mana o de Habila pólao.

²⁵ À laakari ke, àsun gí yā'orii pì yā mairo. Lákū gbē kū ò gí Luda lédamma mai zíte lanò dí boro nà, ókōnò se, lákū Luda ten lé dawá zaa musu, tó o kpe līne, oni ó pó o d̄o yá? ²⁶ A kòto zíte lùkaluka yā, akū à lé sè à pì, áni gu lukaluka gèn do d̄o, adi ke zíte adonlo, kū musuome sà. ²⁷ Kū à pì, gèn do d̄o, abirekū ten piwēre Luda pókēna kū ani lukaluka pìnò ni gē zélame, de pó kū àdi lukaronò le àgō kun. ²⁸ Abire yāi lákū óten kpata kū àdi yīgāro ble nà, ò Luda sáabu kpá, ògō donyī kenē lákū à yei nà, ògō mì natene vīnakenanēe gūn. ²⁹ Zaakū ó Luda bi té kū àdi kūrmmame.

13

Lédammanaa

¹ À wé tā àgō gbēke vī kū kōo. ² À laakari d̄o nibókūnaaa, zaakū len gbēkenò malaikano yàrii kè dōnaa sari le. ³ À tó gbē kū ò n̄ ká kpésira gūnno yā d̄oágu, lákū á kú kúñwo kpésiran bà, kū gbē

kū òten wé tāmmanɔ, lākū ákōnɔme òten wé tǎáwa bà. ⁴ Baadi gō nɔsena da yǎ bèereɗe ũ. Òsun n wúteki gbāsī kpáro, zaakū Luda ni yákpate ke kū zinakerinɔ kū pǎpǎkerinɔ. ⁵ Yena ɔgɔi sún doáre arero. À ze kū pó kū á vīo, zaakū Luda pì:

Mani n tónlo,

mani pǎ kpányī zikiro.

⁶ Abire yǎi odì kùgbāna ke ò pi:

Dikirime ma kpanyīri ũ,

vīna ni ma kūro.

Bón bisāsiri ni fɔ à kemeneɗe?

Sa yǎpura onaa

⁷ À tó á don'areɗe kū ò Luda yǎ òárenɔ yǎ dɔágu. À n kunna tǎasi ká ari a léa, á Luda náani ke lán n bà. ⁸ Yesu Kiri si dokōnɔ gīa kū gbārao ari gɔɔ sīnda pínki. ⁹ Àsun tó ò á sǎte kū yǎ nibɔ dasi dannenanɔoro. À mana ó swè gbāna le Luda gbēke gūn, adi ke sa'opóble kū àdi àre ke ke gbē kū ò zèonɔneronlo. ¹⁰ Bizakuta sa'orinɔ zé vī ò sa'oki kū ó vī póble blero. ¹¹ Sa'oriki dī gē Ludakukin kū pókáde aruo durunnannɔ kēmmana yǎi, akū òdi a gè kpata bùra kpe. ¹² Abire yǎi Yesu gà wète kpe se, à gbà bò gbēnɔne kū a zīda aruo. ¹³ Ò bo ò gé a kīnaa bùra kpe, wé'i ó kū kǎao se. ¹⁴ Zaakū ó wète kū anigō kun vī laro, wète kū àten sun ó wé dɔi. ¹⁵ Abire yǎi ògō Luda sáabu kpá lakanaa sari kū Yesu gbānao ó sa'ona ũ. Gba kū a sísirinɔ dī suon gwe. ¹⁶ À laakari dɔ yámanakena kū kōgbēkenaaoa. Sa bire taka ona mé àdi ká Ludagu. ¹⁷ À á don'areɗenɔ yǎ ma, à mì nateíne, de ò le ò zī ke kū ponnao, zaakū ò de gbē

kū oni n zĩ yā baba Ludaneno ũ. Tó òten zĩ ke kū lésuruo, ani àre keáero.

Lézammanaa

¹⁸ À adua kewere. Yāke teni ó swè vĩro, odigõ ye ògõ kú ó dõroo yā sĩnda pínki gũn. ¹⁹ Ma wé keáwa à adua kemene, atēnsa mà le mà su á kia likalika.

²⁰ Luda aafiade kū ó Dikiri Yesu fùte bona gan sādāriki ũ a bàka kunna kūoo goro sĩnda pínki aru gāi, ²¹ à á keke kū mana pínki, de à a poyenyĩna ke, à yā kū à kàagu ke ó gũn Yesu Kiriisi gāi. Àkū mé à gakuri vĩ goro sĩnda pínki, aami.

²² Ma gbēno, ma wé kèáwa, àgõ lédamma yā pì kũna kū menao, zaakũ takada kū ma kèáre zõkõro.

²³ Àgõ dõ kū ò ó gbē do Timoti gbàre. Tó à kà la tera, óni su á gwa lele. ²⁴ À fõ kpá á don'arēdeno n pínki kū Luda gbēno pínki. Itali būsudeno fõ kpàáwa.

²⁵ Luda gbēke keáre á pínki.

Luda yá takada kú Bisá yáo
Portions of the Holy Bible in the Busa language of
Nigeria

copyright © 2005 SIM International

Language: Bisá (Busa)

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-10

PDF generated using Haiola and XeLaTeX on 11 Nov 2022 from source files dated 9 Oct 2020

8631d380-7d17-5581-abf9-174814e8ccc3